

Regional News Unit AIR Aizawl  
Thursday, August 15, 2024

Time - 7:30 -7:40Hrs

## REGIONAL NEWS BULLETIN

### HEADLINES (MORNING)

- Chief Minister Pu Lalduhoman Independence Day pualin Mizoram mipuite duhsakna chibai a buk
- Vawiin ram zalenna champha vawi 78-na, Independence Day pualin Governor Dr. Hari Babu Kambhampati-a'n Mizoram mipuite chibai a buk a, ram tana Zalenna sualtute inpekna zahawm tak hre rengin ram pumpuia khua leh tui te rualin hnam pasalthate zah takin chibai a buk tih a sawi.
- PHE Minister, Prof. Lalnilawma'n lei chung tui la chhuaka hman tum reng reng ten sorkarah phalna an dil a ngai tawh, a ti.



### INDEPENDENCE DAY - CM AT LAMMUAL

Ram chung hmun dang te rualin Mizoramah pawh hlim leh phur takin Independence Day vawi 78-na lawm mek a ni.

State chhunga Independence Day lawmna lian ber, Aizawl Sipai Lammualah tukin dar 8 khan Chief Minister Pu Lalduhoma'n Hnam Puanzar pawt pharhin Parade Contingent 27-in Hnam Puanzar chibai an buk a chhang let a.

Thu sawiin Chief Minister chuan, he ni ropui takah hian Mizoram mipuite, ram chung leh pawna India mite zawng zawng duhsakna chibai a buk a. India-in zalenna a neih nana thi leh thau pawlha mahni inphata nun thâpa lo beitu hrulaitute leh zalenna sualtute thlawp tlattu mipuite inpekna ropui tak kha mi tinin hre thar leh se a duh thu a sawi a.

'A hmasa berah Mizoram' tih chu mipui rilru kaihrulaitu ni reng se a duh thu leh a sorkar chunga mipuiin rinna an nghah ngam avanga a lawmthu a sawi a. Mipuite beiseina leh duhthusam tihlawhtling turin tha thlah lovin theihtawp an chhuah zel dawn tih sawiin, a sorkar chu thla 8-a upa chauh la ni mah se rorelna leh inrelbawlnaah danglamna tam tak hmuh tur a awm tawh a ni, Chief Minister chuan a ti a. Sorkar chak, langtlang leh hmasawna kawnga theihtawp chhuah tura an intiamnate tihlawhtlin ngei an tum tih a sawi nawn leh a. Mipui tana a tha ber tur ngaihtuah chungin a sorkar chuan hna a thawk zui zel dawn a ni, a ti.



### 78<sup>TH</sup> INDEPENDENCE DAY

Vawiin ram zalenna champha vawi 78-na, Independence Day pualin Governor Dr. Hari Babu Kambhampati-a'n Mizoram mipuite chibai a buk a, ram tana Zalenna sualtute inpekna zahawm tak hre rengin ram pumpuia khua leh tui te rualin hnam pasalthate zah takin chibai a buk tih a sawi.

Independence Day lawmna puala a thuchahah Governor chuan Prime Minister Narendra Modi-a'n kum 2047-a ram changkanga India hlankai a tumna thlâwp turin mipuite a chah a, Viksit Bharat ni turin Viksit Mizoram nih tum hmasak a ngai a ni, a ti.

Larsap chuan Mizoram chu sum leh pai lama harsatna tawk State a nih thu sawiin hetiang dinhmunah hian mipui vantlangin Central sorkar hnuaiah 'social security scheme' tam tak a awm tih an hriat a ngai a, heng scheme hrang hrangte hi a kaihnawih thuneitute, bank leh official dangte hnen atanga zawtfiah turin mipuite a chah nghal bawk a.

Mizorama hmasawna ruhrel lian tham din tiharsa em emtu pakhat chu inkalpawhna kawngpui tha tawk lo chu a ni, a ti a; hei vang hian Bairabi leh Sairang inkara Rêl kawng siam zawh hun tur a nghahhlelhawm takzet a, a chhan chu he Rel Kawng hian Mizoram hmelhmang a la rawn thlak danglam dawrh dawn a ni, a ti a. Chutih rualin kawngpui siamna atan Central sorkar atanga sum tam tak Mizoramin a dawng chung a kawng siam hna tam zawk zawh a ni lo thin chu a pawt takzet a, dam khawchhuahna kawngpui tih mai theih, Vairengte leh Sairang inkar National Highway 4-lane zawh a la ni lo pheih chu a pawt zual a, chhât thiam phak bakin mi a tithuanawp mek a ni, tiin Larsap chuan, kawngpui tha neih hmasak hi hmasawna ruhrel lian dang te din tura thil pawimawh hmasa ber a ni tih hriat ni se, a ti.

Mizorama Independence Day lawmna pui ber chu Aizawl Siapai Lammualah tukin dar 8 khan neih a ni a. He hunah hian Chief Minister Pu Lalduhoma chu khuallian a ni.

Mizoram sawrkar chuan he hun pawimawh tak hmang tur leh a hmanna hmunah te tel theuh turin khua leh tui zawng zawng a sawm a ni.

<><><>

#### I DAY AT AKASHVANI AIZAWL

Akashvani Aizawl chuan tukin khan Independence Day vawi 78-na, Aizawl Tuikhuahtlanga an station-ah hlim takin an lawm.

Station Director, Cluster Head ni bawk Pu D.R. Lalropuia'n Hnam Puanzar a pawt pharh a. Thu sawiin, Independence Day hmanpui tura an sawm Sikul naupangte nena Hnam Puanzar hnuaia Hnam Hla an han sa rual thup thup mai chuan British awpna hnuaia kum 197 chhung teh meuh India ram a awm hnua lu chhum ban chhum huama ram zalenna sualtute hlut zia hriatchhuahtir se a duh thu a sawi a. Hnam Pa, Mahatma Gandhi te, Jawahar Lal Nehru, Subash Chandra Bose leh huaisen taka India Zalenna sual chhuaktute hming pawh hre chhuak thar leha zahna chibai buk mawlh mawlh turin kalkhawmte a sawm a.

Independence Day chuan mihring nun kawng atana thil dik leh tha ti tura mi tin duhthlanna, intluktlanna leh mimal dikna leh chanvo a humhalhsak flat avangin chumi chu a taka tihlawhtling turin mi tinin mawh an phur theuh tih hriaa theihtawp chhuah tlanga India chu ram nuam, ram entawntlak, mi tinte dikna chanvo humhalhna rama siam zel turin kalkhawmte a chah bawk.



#### I-DAY SECURITY

Boruak muanawm tak hnuaiiah vawiin Independence Day lawm a nih theih nan venhimna pawh khauh taka kenkawh a ni.

IGP (Law and Order) Pu Lalbiakthanga Khiangte sawi dan chuan Aizawl leh state chung khawpui dangachte venhimna uluk zual a ni a, khawi atang maha thil duhawm lo thleng a awm loh nan Police chuan hma an la a, Aizawla Independence Day lawmna pui ber Sipai lammual leh a chhehvelah pawh ngawrh lehzuala duty a ni.

Traffic pawh khauh taka duty-tir an ni a, lirthei vak vel tibuai lo turin he ni lawmnaa tel te chuanna lirthei hunna tur pawh ruahman fel vek a ni bawk.

Hetihlai hian ramri-ah te pawh venghimtute uluk taka dah an ni tih Pu Lalbiakthanga chuan a sawi bawk a. Thenawm ram te leh state dang te nena inrinaah te police leh paramilitary force te dah an ni a. Bangladesh ram chhunga buaina thleng mek vang pawhin ramri hi uluk lehzuala ven a ni tih a sawi.



#### PHE MINISTER PRESS CONFERENCE

PHE Minister, Prof. Lalnilawma'n lei chung tui la chhuaka hman tum reng reng ten sorkarah phalna an dil a ngai tawh, a ti.

Nimina a pisaa chanchinbumite a kawmnaah he thu hi sawiin Minister chuan, Mizoram sawrkar thuchhuak angin Mizoram Ground Water Act, 2023 leh Rules 2024 hman a nih tak avangin he dan kengkawh tur hian Mizoram State Ground Water Authority (MGSA) din a ni, a ti a. State puma lei chung tui hausakna humhalh leh hman dan mumal takin kalpui a ni ang a, he dan hnuaiiah hian tui lakchhuah phalna, registration leh licensing pek dan, khap leh humhalh dan leh dan zawm lote hremna a awm a ni, a ti.

PHE Minister chuan lei chung tui la chhuaka hman tum reng reng te chuan Mizoram State Ground Water Authority hnenah form awm sa hmanga dilna thehlutin, phalna pekte chauhvin lei verhin lei chung tui an hmang thei dawn tih a sawi a. Lei chung tui la chhuaka hmang mek leh leiverhna khawl nei reng reng te chuan MSGA-ah dilna form awmsa thehlutin inziah luh tur a ni a ti.

Prof. Lalnilawma chuan lei chung tui tam tawklöhna hmun atanga tui lak chhuah khap a nih thu a sawi bawk a. He dan bawhchhia, phalna neiloa hma la lui emaw, khawl register loh hmanga leiverhte chu hremna pek an nih tur thu a sawi a ni.



## **I-DAY WALKATHON**

**Excise & Narcotics Dept huaihawt Independence Day vawi 78-na lawmna leh ruihhlo dona atana “Ruihhlo Do Kawngzawhpui – WALKATHON – Walk Against Drugs’ chu nimin khan neih a ni a, thupui atan – Kan tanho phawt chuan khawtlang him zawk, hrisel zawk leh ruihhlo laka fihlim kan din thei ang” tih hman a ni.**

**Excise & Narcotics Department Minister Pu Lalnginglova Hmar in he hun hi a hmanpui a, thu sawiin, ‘India ram zalenna sualtute’n nunna hial chanin ke an pen a, anmahni avangin India ramin zalenna a nei a. Chutiang bawkin Mizoramah sawrkar, khawtlang, tlawmngai pawl leh kohhranin ruihhlo an do a, a rah hmu nghal mai lo mah se beidawng lova an do zel chuan Mizoram chu ruihhlo lakah a la zalen ngei ang tih beisei chungin ruihhlo do zel ni se, a ti.**

**Ruihhlo Do Kawngzawhpui hi Excise & Narcotics Commissioner Pu Z. Lalhmangaiha’n a kaihruai a. Pu Peter Zohmingthanga, Joint Commissioner of Excise & Narcotics chuan ruihhlo laka fihlim tur leh ruihhlo dona kawnga an mawhphurhna hlen tura kalkhawmte intiamna a kaihruai a. School hrang hrang atangin zirlai 250 chuang an tel a, Central YMA OB leh Central YMA Kumpuan Committee te bakah Department thawktute leh ruihhlo dona kawnga mi thahnemngai mi 400 chuangin kawng an zawh a ni.**

